



Հանրապետական մանկավարժահոգեբանական կենտրոն

«Հանրակրթական դպրոցների ուսուցիչների և ուսուցչի օգնականների դասավանդման հմտությունների զարգացման ապահովում» ծրագիր

## ՀԵՏԱԶՈՏԱԿԱՆ ԱՇԽԱՏԱՆՔ

Դպրոց՝ Գեղարքունիքի մարզի Գավառի 5 հիմն. դպրոց  
Թեմա՝ Սովորողների մեջ ստեղծագործական ունակությունների զարգացումը «Մայրենի» առարկայի դասավանդման ընթացքում

Վերապատրաստող, մենթոր՝ Գոհար Շահինյան  
Ուսուցիչ՝ Նորա Գոզեյան

Գավառ 2023

## Ներածություն

«Վիքիպեդիա» ազատ հանրագիտարանում գրված է. «Ստեղծագործել նշանակում է սեփական հոգու դարբնոցում կոփել ձևեր, որոնք կարժևորեն մարդու կյանքը: Յուրաքանչյուր իսկական արվեստագետ, երբեմն ինքն էլ չգիտակցելով, ստեղծում ու արտահայտում է իր ժողովրդի գիտակցությունը: Ստեղծագործությունը ոչ միայն պատանեկան անմեղ տարերք է, այլ նաև հասուն անձի ձգտում է շարունակելու իր կյանքը մահվանից հետո: Այն մարդկային այնպիսի դրսևորում է, որի միջոցով իրականանում է անձի ազդեցությունը աշխարհի վրա, այն կապված է մարդու ակտիվության հետ»:

Հոգեբանական բառարանում ստեղծագործելը մեկնաբանվում է հետևյալ կերպ. «Այնպիսի գործողություն, որը նոր և ինքնատիպ արդյունքների (մտքերի, վարկածների, հոգևոր և նյութական արժեքների) է հանգեցնում»<sup>1</sup> :

Ըստ Հանրակրթության պետական չափորոշչի՝ միջնակարգ կրթության կարողունակություններից մեկը սովորել սովորելու կարողունակությունն է, ինչի միջոցով սովորողները ձևավորում են իրողություններին ստեղծագործական և նորարար մոտեցումներ կիրառելու ունակություններ:

Կրթության ժամանակակից ռազմավարությունը պահանջում է աճող սերնդի ստեղծագործական ներուժի բացահայտում, դրսևորման հնարավորությունների ընդլայնում: Սովորողները պետք է ունենան ոչ միայն կայուն գիտելիքներ, այլև կարողանան բարձր մակարդակով լուծել նոր ժամանակների առաջադրած խնդիրները: Արդի կրթական համակարգի հիմնական խնդիրներից մեկը ստեղծագործական մտածողությամբ, ճանաչողական կարողությունների զարգացմամբ, գիտելիքներն ինքնուրույն համալրելու կարողությամբ օժտված և ժամանակի մարտահրավերներին դիմադրելու պատրաստ անձի դաստիարակումն է: Նոր ժամանակների մարդը պետք է ի վիճակի լինի ինքնուրույն որոշումներ ընդունելու՝ առանց որևէ մեկի կարծիքից և դիրքորոշումից կախում ունենալու, իրերին և հասկացություններին կարողանա նորովի մոտեցում ցուցաբերել, չհամակերպվի

քարացած մտածողությանը, նոր լուծումներով և նոր առաջարկություններով փոխի մեր միջավայրը՝ արդի ժամանակաշրջանին համահունչ: Այդ նպատակով մանկավարժը որոնում է նոր ձևեր և մեթոդներ, ինքնակատարելագործվում է, մշակում է քայլեր, որոնք ուղղված են աշակերտների ինքնուրույնության, նախաձեռնողականության և ստեղծագործական ունակությունների ձևավորմանը և զարգացմանը, նրանց՝ ուսումնական նյութի արագ յուրացմանը, աշակերտների ինտելեկտուալ կարողությունների և ունակությունների զարգացմանը: Մանկավարժական գործընթացի առաջնահերթ խնդիրներից է ստեղծագործական կարողությունների զարգացմանը ուղղված մեթոդների և քայլերի մշակումը՝ երեխաների կրթությանը զուգահեռ: Մանկավարժը գործուն քայլերով պետք է նպաստի կրթված, ինքնազարգացող և ինքնորոշվող, ստեղծագործող անհատի ձևավորմանը: Այսօրվա սովորողը վաղվա քաղաքացին է, երկրի առաջընթացի ակտիվ մասնակիցը: Այդ իսկ պատճառով կրթության և դաստիարակության գործընթացում ստեղծագործ անհատականության զարգացումը ժամանակակից հասարակության կարևոր խնդիրներից մեկն է:

Անհատականության և ստեղծագործական մտածողության հիմքը դրվում է նախադպրոցական և տարրական դպրոցական տարիքում: Ստեղծագործական մտածողությունից կախված է գիտելիքների, կարողությունների, հմտությունների ձեռքբերումը: Հմտությունների, կարողությունները և գիտելիքների նկատմամբ մարդու ստեղծագործական մտածողությունը հանդես են գալիս իբրև որոշ հնարավորություն: Մեծ է դասավանդող ուսուցչի դերը ստեղծագործական, նախաձեռնող անհատականության ձևավորման գործում: Երբ աշակերտին դեռևս պակասում են կարողությունների և հմտությունների անհրաժեշտ համակարգ, կայուն գիտելիքներ, աշխատանքի ձևավորված հնարներ, պետք չէ հապշտապ եզրակացնել, թե նրա մոտ բացակայում է ստեղծագործական մտածողությունը: Քիչ չեն դեպքերը, երբ մանուկ հասակում երեխայի մոտ դեռևս չեն արտահայտվում և շրջապատի կողմից չեն գնահատվում նրա ստեղծագործական մտածողությունը, սակայն հետագայում բացահայտվում է նրա ողջ ներուժը: Ուսուցչի խնդիրը պետք է լինի անհատի ստեղծագործական ունակությունները զարգացնելը և երեխայի ստեղծագործական գործունեության փորձի ձևավորման համար պայմաններ ստեղծելը:

Մույն աշխատանքում փորձել ենք վեր հանել աշակերտների ստեղծագործական կարողությունների բացահայտմանը և կատարելագործմանը ուղղված քայլերը «Մայրենի» առարկայի դասաժամերին:

### ՄՈՒՏՔ

Գրական ընթերցանության դասերին խնդիր է դրված զարգացնել աշակերտների ստեղծագործական կարողությունները, և այդ խնդրի լուծման համար անհրաժեշտ է հենց ուսուցչի գործունեությունը, նախաձեռնողականությունը, ստեղծագործական ուղիների որոնումը: Ստեղծագործություն սովորեցնելը նախևառաջ նշանակում է ստեղծագործական վերաբերմունք սովորեցնել աշխատանքին: Ստեղծագործական կարողությունների զարգացմանը նպաստում են դասերի ստեղծագործ, ընկերական մթնոլորտը, ուսուցչի և աշակերտների միջև հարգանքի և համագործակցության ապահովումը, յուրաքանչյուր երեխայի նկատմամբ ուշադրությունը, նույնիսկ ամենաչնչին հաջողությունը նկատելը և խրախուսելը: Դասարանում երեխաները պետք է ստանան ոչ միայն գիտելիքներ և հմտություններ, այլև ընդհանուր զարգացում: Ուսուցիչը պետք է պայմաններ ստեղծի աշակերտների ստեղծագործական կարողությունների դրսևորման համար, տիրապետի մարտավարությանը, տեխնոլոգիային, ունենա ծրագիր, որի իրականացմամբ կակտիվացնի աշակերտների հույզերը, երևակայությունը: Ուսուցչի վերաբերմունքը երեխաների ստեղծագործական գործունեության արդյունքներին շատ կարևոր է: Հարկավոր է զգույշ վերաբերմունք ունենալ երեխաների ստեղծածին, ոչ թե քննադատել, այլ ոգևորել, արտահայտել զարմանք և հիացմունք և այդպիսով հաստատել վստահություն և բաց հարաբերություններ աշակերտների հետ: Յուրաքանչյուր քննադատություն կարող է սահմանափակել ստեղծագործ մտքի ազատ թռիչքը, ստեղծել անվստահություն սեփական ուժերի հանդեպ, կաշկանդել ազատ խոսքը և մտածողությունը:

## ԵՐԵՒԱՆԵՐԻ ՍՏԵՂԾԱԳՈՐԾԱԿԱՆ ԿԱՐՈՂՈՒԹՅՈՒՆՆԵՐԻ ԶԱՐԳԱՑՄԱՆ ՀԻՄՆԱԿԱՆ ՈՒՂՂՈՒԹՅՈՒՆՆԵՐԸ

Երեւանների ստեղծագործական կարողությունների զարգացման համար միաժամանակ աշխատում են երկու ուղղությամբ՝ երևակայության զարգացում և ստեղծագործականություն ձևավորող մտածողության որակների զարգացում: Տարվում են աշխատանքներ՝ մարզելու աշակերտի մտավոր հատկությունները՝ հիշողություն, ուշադրություն, ազատ մտածողություն, երևակայություն: Մշակվում է ստեղծագործական գործունեության համակարգված, նպատակային քայլաշար: Ճանաչողական և ստեղծագործական առաջադրանքների համակարգը հանգեցնում է ազատ մտածողության, մտքի սահունության և ճկունության, անսահման հետաքրքրասիրության, համարձակ լուծումներ առաջ քաշելու և զարգացնելու կարողության ձևավորմանը:

Դասերն ընթանում են հետևյալ չորս հաջորդական փուլերով՝

- 1) նախապատրաստում.
- 2) ստեղծագործական մտածողության խթանում.
- 3) որոնողական առաջադրանքների մշակում.
- 4) ստեղծագործական խնդիրների լուծում:

Առաջադրանքները տրվում են ամբողջ դասարանին: Նման առաջադրանքները ոչ թե գնահատողական, այլ կրթական և զարգացնող բնույթ ունեն: Նման աշխատանքը կենտրոնացնում է ուշադրությունը, զարգացնում է մի առաջադրանքից մյուսին արագ անցնելու կարողությունը: Աշակերտն ապրում է առաջադրանքի լուծման ուղիների ինքնուրույն որոնման, հայտնաբերման, ինքնադրսևորման, նորը ճանաչելու հաճույքն ու բերկրանքը: Նույնիսկ թույլ տված սխալն օգնում է նոր բան հայտնաբերելուն, անսպասելի հայացքներ ձեռք բերելուն, ուրիշների հանդեպ փոխվստահությանը,

հետագայում ճիշտ ընտրություն կատարելուն : Աշակերտը կարողանում է ընտրել և ճիշտ որոշումներ կայացնել, սեփական առաջընթացն ինքնուրույն վերահսկել:

Երեխաներին ստեղծագործական ինքնարտահայտմանը նպաստելու համար օգտագործվում են գրական ստեղծագործությունները, ներկայացվում են խնդրահարույց երևակայական կամ իրական իրավիճակներ, կյանքից և գրականությունից կոնֆլիկտային իրավիճակներ, որոնց միջոցով աշակերտները զարգացնում են վերլուծական և երևակայական միտքը, ձեռք են բերում իրենց միտքը արտահայտելու ունակություն: Հասկանալի է, որ միևնույն հուզական վիճակին տարբեր կերպ է արձագանքում ամեն մի աշակերտ:

#### **ԱՇԱԿԵՐՏՆԵՐԻ ՍՏԵՂԾԱԳՈՐԾԱԿԱՆ ԿԱՐՈՂՈՒԹՅՈՒՆՆԵՐԻ ԶԱՐԳԱՑՄԱՆ ՄԱԿԱՐԴԱԿԻ ՍՏՈՒԳՄԱՆ ԶԱՓԱՆԻՇՆԵՐ ԵՎ ՄԻՋՈՑՆԵՐ**

Ստեղծագործական կարողությունը դրսևորվում է աշակերտի յուրօրինակ, ոչ կադապարային մտածողությամբ, լուծումները փնտրելու և որոշումներ կայացնելու ինքնուրույնությամբ, ճանաչողական հետաքրքրություն դրսևորելու, նոր բաներ բացահայտելու ցանկությամբ: Ստեղծագործական կարողությունների զարգացման մակարդակը որոշվում է հետևյալ կերպ.

1. **Ճանաչողական չափանիշով** բացահայտվում են աշակերտների գիտելիքները, ստեղծագործական կարողությունները, ստեղծագործական առաջադրանքների էությունը հասկանալը:
2. **Մոտիվացիոն - դրդապատճառային չափանիշով** պարզ է դառնում, թե որքան մեծ է աշակերտի ցանկությունը դրսևորելու իրեն և ապացուցելու բոլորին, որ ինքը ստեղծագործ և կարող անձնավորություն է:
3. **Գործունեության չափանիշով** բացահայտվում է աշակերտների՝ ստեղծագործական բնույթի առաջադրանքները անկաշկանդ կատարելու, ստեղծագործական երևակայությունը հեշտությամբ ակտիվացնելու, ոչ սովորական մտածելու և դրա միջոցով հետաքրքիր լուծումներ առաջարկելու ունակությունը:

**ԱՇԱԿԵՐՏՆԵՐԻ ՍՏԵՂԾԱԳՈՐԾԱԿԱՆ ԿԱՐՈՂՈՒԹՅՈՒՆՆԵՐԻ ԶԱՐԳԱՑՄԱՆ ՄԱԿԱՐԴԱԿՆԵՐԸ ԵՎ ԴՐԱՆՑ ԲՆՈՒԹԱԳՐԵՐԸ**

**1. Բարձր մակարդակ**

Աշակերտները նախաձեռնող են և ինքնուրույն որոշումներ կայացնողներ, սովորաբար ազատ են արտահայտվում: Հնարամիտ են, ունեն վառ երևակայություն, մտածողությամբ տարբերվում են: Ուսուցչի աշխատանքը այսպիսի աշակերտների հետ ավելի հետաքրքիր է, առաջադրանքները ուղղված են ստեղծագործական մտածողության զարգացմանը և ծավալմանը:

**2. Միջին մակարդակ**

Այսպիսի մակարդակ ունեցող աշակերտները աշխատում են հիմնականում ինքնուրույն, բայց նրանց առաջարկված լուծումները օրիգինալ չեն: Երեխան հետաքրքրասեր է, գաղափարներ է առաջ քաշում, բայց մեծ ստեղծագործականություն չի ցուցաբերում:

**3. Ցածր մակարդակ**

Այս մակարդակի աշակերտները կարողանում են գիտելիքներ ձեռք բերել, որոշակի գործողություններ կատարում են: Սակայն պասիվ են: Նրանց ստեղծագործական աշխատանքի մեջ ընդգրկելու համար ուսուցչից պահանջվում են լրացուցիչ ջանքեր: Նրանք ավելի երկար են մտածում, նրանց ընդհատելով կամ անսպասելի հարցեր տալով՝ շփոթեցնում ենք, կարող են կաշկանդվել, լռել: Նրանց պատասխանները կարծրատիպային են, չեն դրսևորում անհատականություն, անկախություն, նախաձեռնող չեն, գնում են ավանդական լուծումների:

**ԱՇԱԿԵՐՏՆԵՐԻ ՍՏԵՂԾԱԳՈՐԾԱԿԱՆ ԿԱՐՈՂՈՒԹՅՈՒՆՆԵՐԻ ԶԱՐԳԱՑՄԱՆ ՄԱԿԱՐԴԱԿԻ ԲԱՑԱՀԱՅՏՈՒՄԸ ՏԱՐԲԵՐ ՄԵԹՈԴՆԵՐԻ ՄԻՋՈՑՈՎ**

Կիրառում են տարբեր մեթոդներ:

1) «Հնարել պատմություն գոյություն չունեցող կենդանու մասին»

Երեխային հանձնարարվում է պատմություն հորինել մի անսովոր, չտեսնված արարածի մասին, որը նախկինում ոչ մի տեղ չի եղել, ոչ ոք նրա մասին չի լսել և նրան չի տեսել: Այն չպետք է նման լինի ոչ մի մուլտֆիլմի կամ հեքիաթի հերոսի:

## **2) «Երկու բառ»**

Աշխատանքի համար վերցնում ենք 2 բառ: Թող ամեն մի բառը տարբեր աշակերտներ առաջարկեն: Կարող են թղթի վրա գրել և առանձին-առանձին ներկայացնել, որպեսզի մեկը մյուսի գրածը չիմանա: Ստացվում է իրար հետ կապ չունեցող 2 բառ, ասենք՝ պատուհան և ճանապարհ, կամ՝ երկինք և գնացք: Աշակերտները հնարում են պատմություն, որտեղ նշված բառերը դառնում են ստեղծագործության հերոսներ: Անհրաժեշտ է, որ երկու բառերից մեկը բավականաչափ օտար լինի մյուսին, որպեսզի նրանց միասին կիրառությունը ինչ-որ չափով անսովոր լինի: Միայն այդ դեպքում երևակայությունը կակտիվանա՝ ձգտելով նշված բառերի միջև հետաքրքիր կապ գտնել:

## **3) «Երեք առարկա և մեկ պատմություն»**

Խաղացողին իրար հետ ոչ մի կերպ չկապվող 3 առարկա ենք տալիս, ասենք՝ գրիչ, կավիճ, աթոռ, և առաջարկում ենք դրանք գործի դնել՝ տեսարան հորինել ու ցուցադրել: Իրական առարկաները, որոնք կարող է տնտղել, շոշափել, շուռումուռ տալ, երևակայության համար առավել ամուր նեցուկ են, քան բառերը. այս դեպքում երևակայությունը ազատ ճախրում է: Երեխաների համար անսովոր և հետաքրքիր առաջադրանք է սա, որովհետև իրենց շատ ծանոթ առարկաները երևակայության ուժով սկսում են բնավորություն ձեռք բերել, արկածների հանդիպել, սխրագործություններ կատարել և հերոսանալ:

## **4) «Նոր հերոս ծանոթ հեքիաթում»**

Ծանոթ հեքիաթից բառեր ենք վերցնում և ավելացնում ենք հեքիաթի բովանդակության հետ կապ չունեցող բառ: Օրինակ՝ «Մոխրոտը» հեքիաթից վերցնում



ենք «պարահանդես», «արքայագն», «քույրեր», «կեսգիշեր», «կախարդուհի» բառերը և ավելացնում ենք ընդհանրապես կապ չունեցող «համակարգիչ» բառը:

Նման խաղ-վարժության միջոցով հետազոտում ենք երեխայի՝ նոր և փաստերի որոշակի շարքի նկատմամբ անսպասելի տարրին արձագանքելու կարողությունը, նման բառն արդեն հայտնի սյուժեում օգտագործելու, սովորական բառերը նոր համատեքստին համահունչ դարձնելու հմտությունը: Արդյունքներն ուշագրավ են ստացվում:

#### **5) «Վրիպակը՝ նոր պատմության հնարավորություն»**

Մանկական «սխալներից» կարող է ստացվել ինքնուրույն ստեղծագործություն, որի միջոցով երեխաներն անձանոթ իրականությունն են յուրացնում: Ցանկացած սխալ մի պատմություն հորինելու հնարավորություն է: Ամեն ինչից զատ՝ սխալների վրա ծիծաղելն արդեն իսկ դրանցից ձերբազատվել է նշանակում: «Տուն» բառի փոխարեն տղան գրել է «տուփ»: Ծիծաղում ենք և երևակայում. կար մի մարդ, որի տունը մի տուփ էր: Նա ապրում էր այդ տուփի մեջ, իսկ տեղ գնալիս իր հետ էր վերցնում:

#### **6) «Ստեղծագործում ենք միասին»**

Մասնակցում են բոլորը, համատեղ պատմություն են հորինում: Նախապես պատրաստված սովորաթղթե քարտերի վրա տարբեր նկարներ ենք կպցնում: Երեխաներից մեկը առանց նայելու կապուկից մի քարտ է հանում: Քարտը հանողը սկսում է քարտի վրա եղած նկարի մասին երևակայական պատմություն հորինել, մյուսներն ուշադիր լսում են, որպեսզի շարունակեն: Հաջորդ երեխան իր վերցրած քարտի մասին է պատմում, բայց պետք է պատմության իր մասը նախորդի հետ կապի, և շարադրանքի հետագա ընթացքը կլինի նախորդի շարունակությունը: Խաղին մասնակցում են բոլորը, իսկ վերջինը հորինում է ավարտը:

#### **7) «Ծանոթ հեքիաթների խառնաշփոթ»**

Հանդիպում են Մոխրոտն ու Մատնաչափիկը, Քաջ Նազարն ու Անբան Հուռին, Մառցե թագուհին և Մպիտակաձյունիկը, նրանց արկածներն իրար են հյուսվում և նոր հունով ընթանում: Երեխաները հաճախ զվարճալի լուծումներ են գտնում, և դա նրանց շատ է ոգևորում:

#### **8) «Ազատ խոսքի իրավունք»**

Աշակերտները պատկերացնում են, որ իրենց սիրելի հեքիաթների հերոսները հավաքվել են հեքիաթային համաժողովի՝ նվիրված հեքիաթի հերոսների իրավունքներին: Նրանցից յուրաքանչյուրը գնում է ամբիոնի մոտ և ասում ... (նրանք պետք է խոսեք իրենց սիրելի հեքիաթի հերոսի անունից):

#### **9) «Շուռ տված հեքիաթներ»**

Երեխաներն իրենց շատ ծանոթ հեքիաթները ներկայացնում են անսովոր փոփոխությամբ: «Մոխրոտը» հեքիաթում խորթ մայրը բարի էր, ներող, աղջիկը՝ չար, անարդար: «Կարմիր գլխարկ»-ում չար աղջիկը մորաքրոջ տուն էր գնում, հանդիպում է աշխարհի ամենաբարի գայլին: Այսպիսով հեքիաթը այլ շարունակություն է ստանում, դառնում ավելի հետաքրքիր և զվարճալի:

#### **10) «Երեխան՝ ծանոթ հեքիաթի հերոս»**

Երեխաները սիրում են դառալ իրենց շատ ծանոթ և սիրած հեքիաթի հերոսը: Նրանք մասնակցում են գործողություններին, փոխում են սյուժեի ընթացքը, կատարում են սխրագործություններ, կռիվ են տալիս, հաղթում են չարին և հաստատում են բարին: Իրենք հեքիաթում ամենագոր են: Իրական լինելու համար իրադարձությունների վայրը ևս նրանց շատ ծանոթ վայր է վերցվում, օրինակ՝ իրենց խաղահրապարակը կամ բակը, մասնակցում են երեխային ծանոթ այլ մարդիկ՝ ընկերներից, ընտանիքի անդամներից:

#### **11. «Եթե ես միայն...»**

Աշակերտները պատկերացնում են իրենց անսովոր իրավիճակում և շարունակություն են ստեղծում (օրինակ՝ եթե ես միայն կարողանայի մտքեր կարդալ...):

### **ԲԱՌԸ՝ ՈՐՊԵՍ ՈԳԵՇՆՉՄԱՆ ԱՂԲՅՈՒՐ**

Գրական ստեղծագործությունը բառի արվեստն է, ուստի օգտագործում եմ այնպիսի ստեղծագործական առաջադրանք, ինչպիսին է գրական բառի, դրա իմաստի և ձևի վրա աշխատելը: Խոսքը թույլ է տալիս երեխաներին գիտակցել իրենց զգացմունքների աշխարհը և սովորեցնում է հասկանալ բառի առաջ բերած զգացողությունը: Բառի արտահայտչական հնարավորությունները բացահայտելու համար երեխաները կատարում են հատուկ ստեղծագործական առաջադրանքներ: Նրանք պետք է բանավոր և գրավոր պատասխանեն նման հարցերի. «Ի՞նչ տրամադրություն եմ ունենում, երբ լսում եմ «աշուն», «խշոց», «շրշուն»: Բառերը: Ի՞նչ եմ զգում, երբ կարդում եմ «երկինք» բառը և այլն: Այսպիսով երեխան առնչվում է գրական ստեղծագործության ամենախոր գաղտնիքներից մեկին՝ այն հիասքանչ երևույթին, երբ ստեղծագործությունը ծավալվում է մեկ հատիկ բառից, որը անսովոր է, զգացողություններ է առաջ բերում:

Ամեն մի նոր հեղինակի ստեղծագործություն անցնելիս երեխաների ուշադրությունը հրավիրում եմ հեղինակի բառերի ընտրության վրա: Երեխաները գտնում են այս կամ այն արտահայտությունը տեքստերում, ըմբռնում և բացատրում են արտահայտչականությունը, օգտագործում են արտահայտիչ միջոցները իրենց խոսքում:

Բառի նկատմամբ ուշադրություն զարգացնելու համար երեխաներին կարելի է առաջարկել ստեղծագործության հիման վրա խաչբառ կազմել, դրանք ներկայացնել դասարանում և ընկերների առաջարկել լուծել դրանք:

Ստեղծագործական առաջադրանքների համակարգում առանձնահատուկ տեղ է գրավում «Շփոթություն» խաղը: Սա ստեղծագործ բառախաղ է: Խաղի էությունը սա է.

գրատախտակին կամ առանձին թղթի վրա ստորակետերով առանձնացված մի քանի բառ է գրված: Երեխաները պետք է ուշադիր կարդան բառերը, մտածեն և փորձեն հասկանալ, թե որ հեղինակի բառապաշարի բառերն են ընտրված, որ ստեղծագործողի ոճին է դա բնորոշ:

Առաջադրանք՝ «Նոր միտք»

Ծանոթ ստեղծագործությունից հանվում են բառեր և առաջարկվում է այդ բառերը օգտագործելով՝ նոր բանաստեղծություն հորինել:

Առաջադրանք՝ «Ամեն բառը՝ մի աշխարհ»

Ստեղծագործությունից հանված են բառեր, պահանջվում է յուրաքանչյուր բառի տալ յուրահատուկ մեկնաբանություն: Ունկնդիրները որոշում են ամենալավ մեկնաբանությունը և ծափահարությամբ խրախուսում:

Առաջադրանք՝ «Բաց թողած բառ»

Ուսուցիչը կարդում է տեքստը և բաց թողնում մեկ բառ, երեխաները պետք է մտածեն և առաջարկեն ուրիշ իմաստալից բառ՝ համապատասխան տեղում:

Երևակայությունը զարգացնելու, բառերի հանդեպ խնամքով վերաբերմունք դաստիարակելու նպատակով օգտագործում են շատ գրական նյութեր՝ հանելուկներ, բանաստեղծություններ, բանաստեղծական երկխոսությունների ընտրանիներ և այլն: Դպրոցական փոքր տարիքում երեխաները մեծ հետաքրքրություն են ցուցաբերում ինքնուրույն ստեղծագործելու նկատմամբ: Բայց նախքան ինքնուրույն հանգավորել սովորելը նրանք պետք է կարողանան կարդալ պոեզիա, հետևել դրանց կառուցմանը, գեղարվեստական առանձնահատկություններին, սովորել տեսնել պատկերավորման միջոցները (համեմատություն, մակդիր, փոխաբերություն, անձնավորում), որոնք օգնում են հասկանալ հեղինակի զգացմունքները, բառերի ճիշտ կիրառությունները: Հատուկ վարժությունների օգնությամբ սովորողները սովորում են հանգավորել բառերը, ավելացնել հանգավոր տողեր: Կան այսպիսի վարժություններ.

1.Նախադասությունը ավարտի՛ր այնպիսի բառով, որը նախադասության ներսում եղած որևէ բառի հետ հանգավորվի.

2.Տրված բառի համար գտի՛ր հանգով համապատասխան գույգ (ճառագայթ - ..., ճանապարհ-...).

3.Բառերի շարքում միացրու՛ հանգավորված բառերը.

4.«Վանկային աճուրդ»՝ - կհաղթի նա, ով կանչում է վերջին հանգավորված բառը (ասեղ-ահեղ-աղեղ...., լուսավոր, թևավոր-ձևավոր....).

5.Լրացրու՛ բանաստեղծությունը՝ հանգավորելով տողերի վերջին բառերը.

6.Վերականգնի՛ր ցրված բանաստեղծությունը.

7.Ավարտի՛ր բանաստեղծության երկրորդ տողը.

«Երկինքը այսօր մաքուր է ու պարզ,

Թվում է հոգուս ..... /մի չքնաղ երագ/.

8.Տրված են հանգավորված բառեր, դրանք կիրառելով՝ ստեղծի՛ր բանաստեղծություն.

Բերել-ներել, երգեր-բերքեր

9.«Մեկ տողի մրցույթ»-՝ բանաստեղծության առաջին տողը տրված է, մենք վերջաբան ենք տալիս և որոշում ամենահաջող տարբերակը:

«Հանգ» հասկացությունն ամրապնդելու համար ստեղծագործական աշխատանքներում օգտագործում են ժողովրդական բանահյուսությունը, մանավանդ առածներն ու հանելուկները : Երեխաները պատրաստակամորեն և հաջողությամբ

հանգավորում են իրենց հանելուկները, մտածում և ստեղծում են հանգավոր հանելուկներ:

Հանելուկների վրա աշխատելը մտածողության, սրամտության և երևակայության, տրամաբանության ինքնուրույն զարգացման վարժություն է: Երեխաները սովորում են խոսել վառ, պատկերավոր, պարզ բառապաշարով: Հանելուկների կիրառմամբ դասերը հետաքրքիր են և չեն հոգնեցնում սովորողներին՝ տալով նրանց մտքի համար օգտակար վարժություններ: Դասին աշխատանքն իրականացվում է մի քանի փուլով՝ հանելուկների ստեղծում, գուշակում, դիտարկում: Կարելի է առաջադրանքը կատարել և՛ ինքնուրույն, և՛ խմբով: Գովեստի են արժանանում այն աշակերտները, որոնք կարողանում են ճիշտ տեղում գտնել ճիշտ բառը, գեղեցիկ հանգավորել հանելուկները:

Կա նաև մեկ ուրիշ տարբերակ. երեխաներն իրար բառեր են փոխանցում, որոնց վերաբերյալ պետք է հանելուկ ստեղծվի: Աշակերտները գործի են դնում իրենց երևակայությունն ու տրամաբանությունը, բոլորը աշխատում են առավելագույնս զրավիչ ձև տալ հանելուկին, գրել հանգավորված:

«Ինչու՞ են երեխաները այդքան հանելուկներ սիրում,- հարցնում է Ջանի Ռոդարին:- Վստահեցնում եմ, որ գլխավոր պատճառը հետևյալն է. հանելուկները խտացված, գրեթե խորհրդանշանային ձևի մեջ արտացոլում են իրականությունը ճանաչելու երեխայի փորձը: Երեխաների համար աշխարհը լի է խորհրդավոր առարկաներով, անհասկանալի իրադարձություններով, երևույթներով, անհասանելի ձևերով: Հենց երեխայի ներկայությունն աշխարհում գաղտնիք է, որ նա դեռևս պետք է պարզի, մի հանելուկ, որ հուշող հարցերի միջոցով դեռ պետք է լուծի: Եվ այս ճանաչողության գործընթացը հաճախ հենց անսպասելի հայտնագործության, անակնկալի ձևով է տեղի ունենում: Այստեղից էլ այն հաճույքը, որ երեխան բուն որոնումից և իրեն սպասող անակնկալից է ստանում. խաղի ընթացքում նա կարծես մարզվում է»:<sup>2</sup>

## ԳՐԱԿԱՆ ՏԵՔՍՏԵՐԻ ՎՐԱ ԱՇԽԱՏԱՆՔ

Գրական ստեղծագործությունները ընթերցելուց հետո տրվում են ստեղծագործական բնույթի առաջադրանքներ, որոնք պահանջում են սովորողների ինքնուրույն գործունեություն՝ առանձնացնել և կարդալ առանձին դրվագներ, բնութագրել կերպարները, համեմատել նրանց խոսքը, գործողությունները: Աշակերտները սովորում են արտահայտվել հեղինակի, հերոսների, ընթերցողի տեսանկյունից: Երեխաները այս կամ այն հերոսի աչքերով տեսնում են կյանքի այս կամ այն երևույթը: Հնարավոր են տարբեր մեկնաբանություններ, երբեմն նույնիսկ անսպասելի, քանի որ դրանք ստեղծագործական են:

Դասարանը կարելի է բաժանել 3 խմբի՝ բանախոսներ, լրագրողներ, փիլիսոփաներ:

Բանախոսները իրենց պատկերացնում են հերոսի դերում, աշխարհը տեսնում են նրա աչքերով, մյուսներին հասկանալի են դարձնում նրա ներաշխարհը: Պատկերացնում են իրենց ստեղծագործության հերոսի տեղում և պատմում են նրա մասին առաջին դեմքով:

«Լրագրողները» հարցեր են տալիս ստեղծագործության «հերոսներին»: Հարցերը պետք է լինեն անսովոր և հետաքրքիր: «Հերոսների» խնդիրն է տալ ամբողջական, լավ պատասխան:

Փիլիսոփաները խոսում են ստեղծագործության մասին և արտահայտում իրենց մտքերը: Նրանք կարող եք ապացուցել և պաշտպանել իրենց տեսակետը:

Գրական երկի ընթերցանությունը ենթադրում է բոլոր սովորողների ներգրավվածությունը ստեղծագործական գործունեության մեջ: Կախված հակումներից՝ յուրաքանչյուր երեխա ստեղծագործական գործունեության մեջ կարող է արտահայտվել տարբեր ձևերով՝ որպես գրող, քննադատ, նկարագարող, ընթերցող, դերասան:

Ստեղծագործական գործունեությունը ի հայտ է բերում երեխաների գրական և ստեղծագործական հմտությունները, վարժությունները և առաջադրանքները թույլ են տալիս քայլ առ քայլ ձևավորել ստեղծագործական առաջադրանքներ կատարելու կարողություն:

Գրական տեքստերի հետ աշխատելիս հիմնական մեթոդը ստեղծագործական ընթերցանությունն է: Ընթերցանության ընթացքում երևակայության միջոցով ստեղծված պատկերները ընթերցողի ստեղծագործական գործունեության արդյունք են և խթանում են խոսքային ստեղծագործականությունը: Այն կարելի է ներկայացնել՝ ընթերցվածի մասին տպավորություններ արտահայտելով, կյանքից նմանատիպ դեպք հիշելով, շարունակություն հորինելով, նկարագրություններով, ստեղծագործական վերապատմումով:

Դադարներով ընթերցանությունը խթանում է հետաքրքրասիրությունը, տրամադրում երևակայությունը գործի դնելուն և հետաքրքիր լուծումներ առաջ քաշելուն: Մյուսեի զարգացման որոշակի փուլում ուսուցիչն ընդհատում է ընթերցանությունը և տալիս նմանատիպ հարցեր՝ ինչպե՞ս պետք է գործի հերոսը դժվար իրավիճակում, ի՞նչ շարունակություն է ենթադրվում, իրենք ինչպե՞ս կշարունակեին և այլն:

Ընթերցանությունը ավարտելուց հետո համեմատում են ստեղծագործության շարունակությունը իրենց առաջարկածի հետ, հասկանում են, թե ինչքանով են ճիշտ կռահել, ում շարունակությունն է, որ ավելի լավ է ստացվել:

## **ԹԱՏԵՐԱԿԱՆ ՍՏԵՂԾԱԳՈՐԾԱԿԱՆ ԳՈՐԾՈՒՆԵՈՒԹՅՈՒՆ ԳՐԱԿԱՆ ԸՆԹԵՐՑԱՆՈՒԹՅԱՆ ԴԱՍԵՐԻՆ**

Սովորողների ստեղծագործական ներուժը առավելագույնս օգտագործելու, գեղարվեստական խոսքի նկատմամբ հետաքրքրություն զարգացնելու համար կիրառվում է գրական ստեղծագործությունների թատերականացում՝ հատվածաբար կամ ամբողջությամբ: Յուրաքանչյուր աշակերտ, կենդանացնելով որոշակի կերպար,



ցուցաբերում է ստեղծագործականություն, քանի որ դառնում է հեղինակի մտահղացման մեկնաբանը:

Առաջին դասերից փորձում եմ երեխաներին գրավել խաղ-ներկայացումով: Դերերը բաշխվում են, եթե հեքիաթ է բեմադրվում, նաև երեխաներին տրվում են հերոսների դիմակներ: Աշխատանքի այս ձևն օգնում է երեխաներին հոգեբանորեն ազատվել բարդույթներից, ինքնավստահություն զգալ:

Կարող ենք նաև հեքիաթ բեմադրել տիկնիկների օգնությամբ: Նման աշխատանքը օգնում է աշակերտին հետևել իր շարժումներին և հնարավորինս արտահայտիչ դարձնել տիկնիկի պահվածքը, թույլ է տալիս կատարելագործվել և դրսևորել հույզեր :

Որևէ գործ բեմադրելիս երեխաները կերպարները պատկերում են համապատասխան առոգանությամբ, դեմքի արտահայտությամբ, կեցվածքի և ժեստերի օգնությամբ: Դերախաղի միջոցով հաղորդվում են հերոսների հուզական վիճակը, բնավորության գծերը:

Դերերով կարդալ հնարավոր է ցանկացած ստեղծագործության վրա աշխատելիս, աշակերտները առանձնապես սիրում են երկխոսությունները ներկայացնել: Կարելի է նաև կարդալ մի հատված: Գրական գործը ամբողջությամբ դերային խաղով ներկայացնելիս աշխատանքի մեջ ներգրավվում են մեծ թվով աշակերտներ: Վերանում է կարդալու վախը, երեխաներն ավելի անկաշկանդ են դառնում, ստեղծագործականություն դրսևորելով՝ նրանք կերպարները ներկայացնում են սեփական տեսանկյունից: Կարելի է բարդացնել դերախաղը՝ խնդրելով աշակերտներին ոչ միայն արտասանել յուրաքանչյուր կերպարի բառերը ճիշտ առոգանությամբ, այլև ցույց տալ դեմքի արտահայտությունները և հերոսների ժեստերը:

Շատ հետաքրքիր կլինի գրական գործը ներկայացնել մնջախաղի ձևով: Աշակերտների համար անսովոր այս ձևը օգնում է ստեղծագործաբար մոտենալ, առանց խոսքի, միայն դեմքի արտահայտություններով, ժեստերով, շարժումներով տեղ հասցնել ստեղծագործության գաղափարը, հերոսների հույզերը և զգացմունքները:

## ԵԶՐԱԿԱՑՈՒԹՅՈՒՆ

«Մայրենի» առարկայի միջոցով հնարավոր է զարգացնել աշակերտների ստեղծագործական կարողությունները: Արդի ժամանակաշրջանը պահանջում է ունենալ ազատ, ստեղծագործ սերունդ, իսկ այդ գործում մեծ է մանկավարժի դերը: Նա կարող է ծանրակշիռ ներդրում ունենալ աշակերտի ստեղծագործական կարողությունների զարգացման գործում:

Հարկավոր է ստեղծագործական վերաբերմունք մշակել ուսման նկատմամբ: Ուսումը պետք է վերածվի հաճելի զբաղմունքի, ոչ թե անցանկալի պարտականության: Ուսումը զուգակցելով ստեղծագործելու հետ՝ աշակերտը կփոխի իր վերաբերմունքը, կմեծանա նորը իմանալու և ճանաչելու ցանկությունը, կապրի նորը բացահայտելու բերկրանքը:

Ստեղծագործաբար մոտենալով աշխատանքին՝ աշակերտը ձեռք կբերի հաստատական գործելաոճ, նպատակասլացություն, նախաձեռնողականություն: Աշակերտը կդառնա մտքով ճկուն, ինքնատիպ, ավելի ինքնավստահ և հաջողակ:

Մեծացնելով աշակերտի ճիշտ կազմակերպված ստեղծագործական գործունեությունը, նրա ներգրավվածությունը ուսումնական գործընթացում, նպաստում ենք նրա ստեղծագործական նախաձեռնողականությանը և գիտելիքի հաջող յուրացմանը, ինքնավստահություն հաղորդում նրան, զարգացնում ենք ինքնուրույն և ինքնատիպ մտածողությունը:

### Ծանոթագրություններ

1-Ա. Նալչաջյան, «Հոգեբանական բառարան», էջ 191

2- Ջանի Ռոդարի, «Ստեղծագործական երևակայության քերականություն», էջ 55

**ՕԳՏԱԳՈՐԾՎԱԾ ԳՐԱԿԱՆՈՒԹՅՈՒՆ**

Զանի Ռոդարի, «Ստեղծագործական երևակայության քերականություն», «Էդիթ Պրինտ» հրատարակչություն, Երևան, 2011 թ.

Էդվարդ դե Բոնո, «Նոր մտքի ծնունդը», «Սովետական գրող» հրատարակչություն, Երևան, 1982 թ.

**ԲՈՎԱՆԴԱԿՈՒԹՅՈՒՆ**

ՆԵՐԱԾՈՒԹՅՈՒՆ .....	1
ՍՈՒՏՔ .....	3
ԵՐԵԽԱՆԵՐԻ ՍՏԵՂԾԱԳՈՐԾԱԿԱՆ ԿԱՐՈՂՈՒԹՅՈՒՆՆԵՐԻ ԶԱՐԳԱՑՄԱՆ ՀԻՄՆԱԿԱՆ ՈՒՂՂՈՒԹՅՈՒՆՆԵՐԸ .....	4
ԱՇԱԿԵՐՏՆԵՐԻ ՍՏԵՂԾԱԳՈՐԾԱԿԱՆ ԿԱՐՈՂՈՒԹՅՈՒՆՆԵՐԻ ԶԱՐԳԱՑՄԱՆ ՄԱԿԱՐԴԱԿԻ ՍՏՈՒԳՄԱՆ ՉԱՓԱՆԻՇՆԵՐ ԵՎ ՄԻՋՈՑՆԵՐ .....	5
ԱՇԱԿԵՐՏՆԵՐԻ ՍՏԵՂԾԱԳՈՐԾԱԿԱՆ ԿԱՐՈՂՈՒԹՅՈՒՆՆԵՐԻ ԶԱՐԳԱՑՄԱՆ ՄԱԿԱՐԴԱԿՆԵՐԸ ԵՎ ԴՐԱՆՑ ԲՆՈՒԹԱԳՐԵՐԸ .....	6
ԱՇԱԿԵՐՏՆԵՐԻ ՍՏԵՂԾԱԳՈՐԾԱԿԱՆ ԿԱՐՈՂՈՒԹՅՈՒՆՆԵՐԻ ԶԱՐԳԱՑՄԱՆ ՄԱԿԱՐԴԱԿԻ ԲԱՑԱՀԱՅՏՈՒՄԸ ՏԱՐԲԵՐ ՄԵԹՈԴՆԵՐԻ ՄԻՋՈՑՈՎ .....	6
ԲԱՌԸ՝ ՈՐՊԵՍ ՈԳԵՇՆՉՄԱՆ ԱՂԲՅՈՒՐ .....	10
ԳՐԱԿԱՆ ՏԵՔՍՏԵՐԻ ՎՐԱ ԱՇԽԱՏԱՆՔ .....	14
ԹԱՏԵՐԱԿԱՆ ՍՏԵՂԾԱԳՈՐԾԱԿԱՆ ԳՈՐԾՈՒՆԵՈՒԹՅՈՒՆԸ ԳՐԱԿԱՆ ԸՆԹԵՐՑԱՆՈՒԹՅԱՆ ԴԱՍԵՐԻՆ .....	15
ԵԶՐԱԿԱՑՈՒԹՅՈՒՆ.....	17
ՕԳՏԱԳՈՐԾՎԱԾ ԳՐԱԿԱՆՈՒԹՅՈՒՆ .....	18